



CM Khandu-i Indian Army Shaurya Sambandh tenüנג asanger



Trump ajurui Israel PM Netanyahu tanü Washington-i arutsü

NFHRCC-i Foothills road mapatong nungitba nenshir

Dimapur, July 26, 2026 (TYO): State sorkari Foothills Road ya Trans Nagaland Highway kübok National Highway jenjang nung ajungkettsü ashiba pusema nungiter ta Nagaland Foothills Road Coordination Committee (NFHRCC)-i metetdaksüogo.

2018 nungi iba lenmang National Highway jenjang nung ajungkettsü tebilemba liasü aser iba asoshi state sorkar dang Ministry of Road Transport and Highway (MoRTH), Govt. of India den tanen makai merangsü ayongzüker ta July 25, 2026 nü NFHRCC senden ka nung lemtetogo.

State sorkari iba Mega Project atema atadang aser working season tonga arudang SASCI loan Scheme kübok 2024-25 nung administrative approval ngua aliba atema Work Orders agütsütsü mepishir ta NFHRCC-isa ashi.

Tanüngba division nung Foothills road yangluba nung 2nd

Phase renema inyaksü atema Work Orders nüngdaker ta parnokisa ashi.

NFHRCC-isa bangdak Department dang Foothills Road nung maparen lapokba anena atar lenmang ajunga yanglutsüba nung temulung agütsütsü metetdaksüogo.

2013 nungi noktakba ama Foothills Road yangluba tenüנג nung telok mesüra kija shingaia tax meshitsü memela anungji Village Council ketdangpurtemi bangdak Department den amalitepa iba mapa inyakba nung tenük yoktsü mepishir ta NFHRCC-isa metetdaksüogo.

Bangdak Department-i Baghty aser Peren division tem nung Bridge Contractors nem senotsü talila agütsüsemstü ayongzüker kechiyong parnoki original DPR nung aliba dang nungi teimba endoker yanglur ta The Media Cell, NFHRCC-i sangdong ka nung ashi.

Advisor Tongpang-i anentsüh aludak semdang



MLA & Advisor Tongpang Ozukum den ketdangsürtem aser tangartemi anentsüh aludak semdangba angur.

Dimapur, July 26, 2026 (TYO): MLA & Water Resources Advisor Tongpang Ozukum-i Chuchuyimlang kübok anentsüh aluba tesemtem semdangogo.

Advisor Tongpang-in Chuchuyimlang aser Unger tsüingda NH-2 (181.100 Km) nung anentsüh aluba semdangdang district administration aser PWD (NH) ketdangsürtem den ajurutepa sensaksem.

Iba anentsüh ya ali anenoka aidak alu aser iba jagi meyanglutettsü anungji lenmang tanga ka atutsüsa nüngdaker ta ketdangsürtemi pa dang ashi.

Advisor Tongpang-isa Chuchuyimlang aser Unger yimtsüingtem nungi Council züngsemtem den ajurutepa sensaksem aser highway paitoka lenmang tasen yanglutsü ali agütsütsü mepishi.

NH-2 shibangba ajanga Mokochung, Zunheboto aser Tuensang district temi essential commodities aser tanga khu

abenba nung timtem ajurur anungji Village Council züngsemtemi highway lapoktsüba nung akokba tashi yariteptsü aser amalitep alitsü ayongzüker ta paisha ashi.

Advisor Tongpang-isa Nagaland Gandhi Ashram junction, Chuchuyimlang Town nungi Salulamang adena Longleng aser Mon district temi aoba lenmang nung anentsüh aludak semdang.

Paisha Salulamang Village Council züngsemtem dang lenmang tekaraba nung lapoktsü nangzüko.

Iba mapang SDO (C) Changtongya, Sangpangchang Longkumer, EAC Chuchuyimlang, SDO aser PWD (NH) ketdangsürtem, party züngsemtem, Urban Station, Chuchuyimlang Town züngsemtem, Chuchuyimlang Village Council aser Unger Village Council züngsemtemi Advisor Tongpang meina senzü.

Exam Reforms atema high-power task force tentetogo



Nandan Nilekani
Technology Expert



S Somnath
Former ISRO Chairman



Tapan Deka
Former IB Director



V Kamakoti
IIT Chennai Director



Anita Karwal
Former Education Secretary



Amrit Lal Meena
Logistics Expert

New Delhi, July 26, 2026

(Agencies): Infosys co-founder Nandan Nilekani-i aniba task force kati India nung examination systems tajungba akümtsü atema lenmangtem bushitsü aser parnoki iba osang sorkar nem agütsütsü ta Prime Minister Narendra Modi-i Deobarnü metetdaksüogo.

Iba report nung ajemdaker tarutsü tatidangtem agia aotsü ta PM Modi-isa ashi.

"Kaketshirtem tarutsü asoshi India sorkari mera balala maneni agia arudar. Kaketshirtem tarutsü raksatsürtem tepuokdak shizüka odor. Onoki fast-track courts tentetogo. Asüנג Parliament nunga onoki iba tangatetba nung ozüנג tasen kar yanglutsü merangsü" ta Modi-isa ashi.

Cockroach Janta Party (CJP)-i NEET tatidang indang question paper temai adokba anema lungkak aityonga aruba atema Dharmendra Pradhan-i Union Education Minister nungi anenba sülen anogo ka lir PM Modi-i iba osang metetdaksüogo.

"Asenoki tarutsü atema bilemtsüla. Asen examination system dak temulung alemtsüla, asen examination system nung tashishitsü malitsüla aser asen

examination system nung akokba tashi technology amshitsüla" ta paisha ashi.

"Item ajak temulung nung yur alima nung tongtipang technology expert Nandan Nilekani lenisüba kübok high-power task force ka tentettsü lemtetogo. Iba teshimtet telok examination reform nung temulung agütsütsü aser tekaratiba nung iba report nung ajemdaker taruba examinations agia aotsü" ta PM Modi-isa metetdaksü.

Nilekani dak alia iba task force nung wadang balala nungi domain experts densema lir. Iba ajanga linük nung examination systems tajungba akümtsü aser talisa iba ya technology aser structural reforms nung asütsü.

Centre sorkari tentetba high-power task force nung Indian Space Research Organisation (ISRO) taoba chairman S Somanath; Intelligence Bureau taoba director Tapan Deka, IIT Chennai director V Kamakoti, taoba education secretary Anita Karwal aser logistics expert Amrit Lal Meena nung züngsema lir.

Centre sorkari July 27, 2026 nü Lok Sabha nung Public Examinations (Prevention of

Unfair Means) Amendment Bill, 2026 benoktsü renema lir. Iba Bill ya examination dak sendakba ashikülak azüoktsü anema legal framework akangshitsü indang lir.

Cockroach Janta Party founder Abhijeet Dipke-i Deobarnü video ka lemsatepba nung mezüngbuba campaign nung takok ngudaktsür ajak dang pelaba metetdaksüogo.

Cockroach Janta Party-i anogo 36 tashi Jantar Mantar nung lungkak aita aruba sülen yashi Dharmendra Pradhan-i Union Education Minister menden nungi sodi agiba ajanga parnok lungkak aitba anenogo.

India President Droupadi Murmu-i Consumers Affairs Minister Pralhad Joshi nem Education Ministry repsema inyaka atatsü lemozütsüogo.

Activist Sonam Wangchuk-ia CJP lungkak aitba pusema nungit aser anogo 25 tashi lumia lungkak aitogo. Paia Centre sorkar telemtetba pelashishia agizükba metetdaksüogo.

"Dharmendra Pradhan-i mapa nungi anenba ya takok tulu lir saka tenüנג agiba sülen education system nung temelenshi bener arutsüla" ta Wangchuk-ia ashi.

Mizoram sorkar aser arogotemi FCRA magizüker

Aizawl, July 26, 2026

(Agencies): Mizoram sorkar aser state nung tongti arogo teloktemi Centre nem Foreign Contribution (Regulation) Amendment Bill, 2026 dak sendakba nung külem memorandum ka agütsütsü lemtetogo.

Honibarnü Chief Minister Lalduhoma'er kidang Mizoram Kohhran Hruaitute Committee (MKHC) aser Council of Churches in Mizoram (CCM) lennirtem den senden ka amending iba lemtet agiogo.

Iba senden nung Foreign Contribution (Regulation) Act

(FCRA) nung temelenshi asütsüba onüktem benoka lemsatep aser iba Bill ya magizüker ta mulungtepa liasü.

Senden nungsa state sorkari memorandum ka renemtsü aser iba nung Bill nung temelenshi kar asütsü shidangtsü lemtet.

Chief Minister Lalduhoma-i Union Home Minister Amit Shah den ajuruteptsü aser New Delhi nung MKHC aser CCM külem teshimtet telok kati pa nem memorandum agütsütsü atema mapang meshitsü atema senden nungsa telemtetba agiogo.

Iba senden nung CM Lalduhoma den pa advisers aser

MLAs Lalmuanpuia Punte aser TBC Lalvenchunga na aden.

Mizoram Pradesh Congress Committee-i CM Lalduhoma dang state Assembly nung special session ka jazüka FCRA Amendment Bill anema bangzüנג ka renemtsü ayongzükerba sülen anogo ishika lir iba senden menogo.

Congress-i Lalduhoma dang FCRA Amendment Bill nung keta aliba onüktem ya Khristantem aser non-governmental organisations (NGOs) atema lendong lir anungji Centre dang Mizoram-i iba Bill magizüker ta ashitsüla ta ayongzüker liasü.

Kohima Ao Pensioner Union lokti senden menogo



Dr. S.C Jamir-i Kohima Ao Pensioner Union indang 4 buba lokti senden nung jembidang tangokba noksa nung angur.

Dimapur, Chiteni/July 26 (TYO): Kohima Aor Pensioner Telungjem 4 buba lokti senden KABA Jubilee Memorial Centre nung July 24, 2026 nü mena liasü, kong o jembir Goa, Maharashtra, Gujarat aser Odisha nung taoba mapang angh inyaka alisang aser taoba mapang Nagaland chief minister inyaka alisang Dr. S.C Jamir liasü.

Pai iba sentong nung jembidang, tanga yimsü amangba kidanger states aser linüktem nungi Naga nunger küm aika Tsüngremi kumzüka aru aser American Baptist Mission ajanga Aor aliba tesem nung Khristan yimsü prokshi aser Nagaland tesem ajunga nung osang tajung prokshiba nunga Aor tem samanir sür inyak aser iba sülen Aor aliba tesem nung shisaliok prokshia ao, ta ashi.

Naga yimten tensa kanga benjar aliba World War II sülen Dr. Imkongliba lenisüba nung lungjema Naga People Convention tentet. Anungji Aortem ya shisaliok, yimtenren aser tamangba yimsü prokshiba nung Naga nunger rongnung mezünpur lir, ta pai ashi.

Naga Political Issues onük nung kongshia jembidang, tanga states den Nagaland loktepba aser state nung ochimashi aliba ajanga Nagaland nem tamajungtiba state nungja agütsü, aser Nagaland ya tribalism, fractionalism aser telungpur tebilemtsü agi tim atemer, ta pai ashi.

Pai Ao pensioners tem dang item ochimasü müreksü aser sorkar tenzükbä mapang anguba shisatsü amshia administration, terenlok aser clean election system nung temelenshi bener arutsü

ayongzüka liasü.

Nenoki nenok dak aliba shisatsü ya arogo aser tanga lokti aser yimten sapang balala nungi lemsateptsü akok, ta pai ashi.

E.T. Sunep, IAS (Retd) ajanga tajungshi o jembidang, pensioner tem ya küm aika mapa inyaka tensa balala ajangshiba nungi shisatsü jenti ngur alirtem lir, ta ashi.

Tain akumba ama yimya tajung amshitsüla, tangar dak kongshitsüsa litettsüla aser Khrista asoshi tenyar ama alitsüla, ta pai ashi.

Iba sentong nung KAPT tatong tir L. Chubalepzuk-i anir külem pensioner asürtem bilemteta minute ka süngjema alia. KAPT tir Dr. L. Temsu Jamir-i pela agizükba o jembir aser tezülur N. Wati Atsongchanger-i melepzüng o jembia liasü.

Kohima nung NSCN/GPRN-K (Michael) züngsem ana apu



Dimapur, Chiteni/July 26 (TYO): Kohima Police-i NSCN/GPRN-K (Michael) faction indang züngsem ana National Highway-29 nung truck drivers dak tenük yoker tashiyim amshia senotsü meshiba nung dena lir ta aitsüba yong puogo.

Kohima Police janga sangdong ka nung ashiba agi, National Highway-29 nung mejangjaba nisung temi truck drivers tem dang tashiyim amshia senotsü meshir ta Honibar anüngdang 11:40 ako meta osang tejangja aruba sülen tena ya apu.

Osang angazükba nung ajemdaker police team ka itangjisa tenteta New SKV Petrol Pump, Merhülüetsa Colony, Kohima leni yoka liasü.

Iba tesem atongba sülen parnoki osang nung shia aliba den putepa repranger apu. Kanga miimshia repranga atar parnoki tim masüba mapa inyakba jangjaba sülen tena ya pua liasü.

Police temi tena apuba sülen tena ket nungi Government of the People's Republic of Nagaland (Finance Committee) tenüng nung 'extortion slips' aika ngutet.

Iba ken o nung pua alir ana ya arishi küm 37 tain Beilie Rupreo, SS Leacy, NSCN/GPRN-K (Michael), permanent resident ya Chiephobozou Police station kübok Chiechama village nung aser tang Sovima village near Old Air Field Colony,

Chümoukedima nung telidak aser arishi küm 39 tain Kevingulie Metha, SS Khapur, NSCN/GPRN-K (Michael), permanent residence ua Chiephobozou Police Station, Kohima district kübok Nachama yimtsüng nungi aser tang High School Colony, Kohima nung telidak alitsü, ta Kohima Police sangdong ajanga ashi.

Tena pua tena ket nungi ozüng agi memelaba osetsüset ngutetba sülen South Police Station, Kohima nung ken o ka benoka bushisüngdang tenzükogo.

Police-i ashiba agi, tai tonglokja alirtem dang maneni asüngdangya südar aser iba nung tanga agent tem, sen agütsürtem densema ano tanga district tem nung ozüng alema inyakba maparen den sendaktepa aliba network tuluba bushitettsü atema bushiteptar.

District nung nüburtem tetsübo aser tashiyim amshia senotsü meshiba nungi kumzüka ayutsü aser tzüzüng ozüng shidak amshitsü temulungtetba nung lir, ta Kohima Police-i ashi.

Parnokisa nüburtem, transporters, shishilempar aser business establishments ajunga dang tashiyim amshia senotsü meshiba lira anasatiba police station nem tetsübo makai osang agütsütsü ayongzüka aser osang agütsürtem tenüng miimbanga ayutsü ta ashi.

AOR MEYONG ALI AYOKTSÜ LIR : DOYAPUR, DIMAPUR

12,000 Sq. Ft 75/- per Sq.Ft.
Around 60 Mtrs away from the Main Highway.
Connected by Village Road.
Near Little Daffodils Hr. Sec. School, Doyapur.
Contact- 8731826575 / -7005173910.

Kohima DC-i Mezoma aser Sechüma yimtsüngtem semdang

Dimapur, Chiteni/July 26 (TYO): Tang teinyakdak House Listing and Housing Census operations reprangshimtsü aser yimtsüng nung lenirtem, census ketdangsur aser nüburtem den sensaksemtsü atema Deputy Commissioner & Principal Census Officer, Kohima, B. Henok Buchem, NCS ajanga June 24, 2026 nü Mezoma aser Sechüma yimtsüngtem semdanga liasü.

Mezoma yimtsüng nung Deputy Commissioner-i House Listing Operations takok ngua tembangba tenüngsang agütsü aser Supervisors aser Enumerators temi bendanga agütsür inyakba ajanga lir, ta ashi.

Census personnel ya district indang administrative officers temi kanga kumdanga shimba lir, shirnoki iba mapa meteta alirtem kanga junga shima liasü, ta pai ashi.

House Listing phase ya tetenzüker ang lir aser February ita agitsü aliba Population Enumeration ya tongtipangtiba asütsü, ta Buchem-i ashi.

Pai nisung ajak dang taruba phase nunga kasa amalitep süa Census takok ngua agitsü ayongzüka liasü.

Kohima DC-ia yimdaklirtem dang teyari nüngdakba mapang arendaka melie pa dangi arutsü ashi aser pa Deputy Commissioner ka ama masü saka adianu ka ama bilemtsüla, ta ashi.

Mezoma Village Council Chairman, Vikehelie Victor-i Deputy Commissioner dang pelaba lemsatepa liasü.

Iba sülen pai Sechüma yimtsüng semdanga yangji putu menden, lanur, kaketshir, tetsür tentet aser teintet rogotem ajurua liasü.

Yangji House Listing operations inyaka aoba indang osang agitepba sülen Buchem-i pelaba lemsatep aser nüburtem den sensaksema liasü.

Infrastructure tsütsü Kohima district ya tanga districts aika dang tajungba jenjang nung lir aser yimdaklir temi pei aliba tesem nung lenla ajaklen terenlok asoshi maneni telungjem nung inyaksüla, ta pai ashi.

Pai Sechü-Zubza terenlok asoshi mangdang tajung lir, aser aji tangbo mangutsü, saka meilongi angutsü ta ashi.

Pai nüburtem dang ano electoral rolls indang Special Intensive Revision (SIR) asoshi renema alitsü ayongzüka aser temsüa aliba voters inokba aser metemsüba voters indokba nung yariteptsü ashi.

Sensaksemba mapang yimdaklir temia sorkar dang ki o jen terenlok mapa inyaksüba asoshi pelaba lemsatepa liasü.

Parnoki Deputy Commissioner dang ano nüngdakba lemsatepa liasü. Shingaia mejaok sernung pei sasa yimtsüng semdangba Deputy Commissioner mezüngbubaji Buchem asütsü, ta yimdaklir temi ashi.

DC Kohima-i Office of the Sub-Divisional Officer (Civil), Sechü-Zubza semdanga yangji staff tem den sensaksema liasü aser maneni bendanga agütsür nübur tenzükbä nung nokdaksü ajungmesoa liasü.

DC Kohima, Buchem meina SDO (Civil), Sechü-Zubza, James Renbi Kikon, NCS; EAC Dr. Riku Khutso, NCS; District Public Relations Officer Atuzo Peseyie aser Census supervisor aser enumerators tem oa liasü.

Strandberg Guitars nung Arenlong artist kumogo



Dimapur, Chiteni/July 26 (TYO): Nagaland nungi guitarist aser ken mejemer Arenlong ya Strandberg Guitars nung artist ka ama kumogo. Arenlong-i 2020 küm Strandberg Guitar Contest in India akokba mapang Strandberg-i pa meteta akum aser küm trok lir iba tesendaktep ya tali tajungba akum.

Iba endorsement ajanga Arenlong ya tanü-asüng guitar ola tajungba kumdaksüba nung yarir tem rongnung ka akumtsü. Strandberg company ya Swedish luthier Ola Strandberg-i 2012 küm tenzükbä sülen kanga nungtugu kuma Plini aser Jordan Rudess nunger ama

guitar atemer tejangja nübu temi amshia arur.

Arenlong ya 'progressive rock' aser 'metal' meyoktepa ola tajung adokdaksüba guitar atemer aser ken mejemer ka ama akum.

Arenlong-i Strandberg Contest akokba den Boss Guitar Maestro Contest (2015), National Guitar Solo Contest (2014) aser Hornbill International Rock Contest (2013) nung Best Guitarist konang tem nguteta liasü. 2020 nunga UK nung nungtugu guitarist Jack Gardiner-i ayongzükbä international online guitar contest-a pai koka liasü.

Pa kisüng mapa alema oa Arenlong ya NAMMA Music Artist Roster nunga Abhay Nayampally, J-Rod Sullivan, aser producer Sandeep Chowta nunger den lungjemer EP Treekam nung shilem agia liasü. Tang Strandberg den lungjemba ama Arenlong yagi Hotone Audio aser SIT Strings amala brand tulu tema endorse süa lir.

Pralhad Joshi-i Union Education Ministry repsema abentsü



July 26, 2026 nü New Delhi nung Union Minister Pralhad Joshi-i Education minister-a repsema inyaksü atema mapa agizükba sülen pa leniba nung senden ka amendang tangokba noksa nung angur. Pralhad Joshi ya Consumer Affairs Minister lir.

New Delhi, Chiteni/July 26 (Agencies): Amongnü Union Education Minister tasenba, Pralhad Joshi-i, pa atema tongtibangtiba teinyaksü mezüngbubaji Ministry of Education tama angatetsüla, iba sülen ang telemtetbatem agia inyaksü, ta metetdaksü. Honibarnü pai Education Minister repsema inyaksü atema mapa agizükba sülen Amongnü pai tongti ketdangsertem den senden aika ayongzüka amen. Joshi-i, Ato kilonser Narendra Modi-i pa dak melung lemteta pa nem iba mapa lezmüksü, ta ashi. Amongnü New Delhi nung osangbenertem den jembidang

pai, "Ni mapa agizükogo aser education ministry junga angatetsü atema senden aika ayongzüka menogo. Iba ya ni asoshi mapa tasen ka lir. Ni akokba tashi junga angatetsü meranga tongti ketdangsertem den jembio. Iba department ya kanga tulu, anungji mezüngbuba nung jungjunga angatetba sülen ang inyaksüji kanga tongtibang," ta metetdaksü. Minister-i, "Yangi ni maparen ajak reprangshidar. Ni osangtsüsang benedener aser iba ministry inyakyim jungjunga angatetsü meranger. Iba department ya kanga tulu, anungji ni jungjunga angatetba sülen ang ni tejangja

lemsateptsü," ta ashi. Linük Tir, Droupadi Murmu-i July 25 nü taoba Education Minister Dharmendra Pradhan-i menden nungi anena züluba shidi agizükogo. Joshi ya Karnataka kübok Dharwad constituency nungi tang agi kümsük (term) trokbenbuba Lok Sabha MP inyaker. Pa ya Minister for Consumer Affairs, Food and Public Distribution, and Minister for New and Renewable Energy teinyakdak. Joshi-i New Education Policy junga benokba aser tesüiba küm 4-5 tsünga kanga tongtibang mapa aika inyakba atema Dharmendra Pradhan nem tenüsang agütsü.

Yogi Adityanath-i Jantar Mantar ajanga tansütsüla: Mehbooba Mufti

New Delhi, July 26 (Agencies): Samajwadi Party (SP) lenir Azam Khan indang Mohammad Ali Jauhar University nung kiojen 38 bendoktsütsü aliba dak sendakba nung Uttar Pradesh Chief Minister, Yogi Adityanath aija taoba mapang Jammu & Kashmir chief minister Mehbooba Mufti-i, UP chief minister-i Jantar Mantar nungi tansütsü lesson angutsüla, ta ashi. Peoples Democratic Party (PDP) Tir, Mehbooba-i X ajanga, "Jauhar University ama shisatsü anguba reju ka raksatsübaji ajanga tesempa aser mangyangba dang sayur. Yogi-i Jantar Mantar ajanga tansütsüla aser linük nung lanurtemi tesempa aser telemsa politics magizüktetbaji pai metettsüla. Longkak aiter kaketshirtem den nokdaker," ta metetdaksü. Samajwadi Party Tir, Akhilesh Yadav-i, Rampur nung

aliba Jauhar University wazüka ayutsü atema kaketshirtemi longkak aitba nung MP tem aser MLA temia shilem agir, ta metetdaksüba sülen Mehbooba-ia kaketshirtem pusema jemb. Akhilesh Yadav-i X ajanga, "'Shisaliok Kümzükan' movement-ia takok angutsü! Rampur nung Jauhar University kümzüksü atema longkak aitba kaketshirtem ajungshitsü atema ozü MP tem aser ML temia shilem agir," ta metetdakja liasü. Yadav-i Uttar Pradesh sorkar dang, tanga kiojentembo regularised sütsüogo, ajisüaka kechiba Jauhar University nung kiojenbo regularised mesütsüteter, ta asüngdang. Taoba mapang UP Chief Minister Yadav-isa, "BJP sorkari UP sorkar administrative order ajanga tanga kiojenbo regularised sütsü, süra kechiba Jauhar University bo mesütsüteter? Kechiba Jauhar

University bo bendanga züngshir?" ta asüngdang. Samajwadi Party-i, iba University nung kiojen bendoktsütsü alibaji anenadoktsüla, kechiyong ibaji ajanga kaketshirtem aika kongshitsü, ta ashi. Tawa Rampur Development Authority (RDA)-i Mohammad Ali Jauhar University campus nung aliba kiojen 38 bendoktsü atema tetuyuba agütsüogo. June 28 nü RDA-i Jauhar Trust dang, campus telung nung ali tasazük 82,309.80 square metres nung kiojenji ozüng alema asüba kiojen lir; kiojen 38 ji temelaba magii asü, kiojen ana dang District Panchayat dang nungi temelaba agir asüba lir, ta metetdakja liasü. RDA-i kiojenji bendoktsü atema trust nem anogo 15 tali agütsüsemogo; iba mapang tashi nungji kiojen mebendokra ketdangsertemi bendoktsü, ta metetdaksüogo.



New Delhi, July 26, 2026: Cockroach Janata Party (JCP) leniba nung kaketshirtemi anogo 36 tashi longkak aitba sülen Honibarnü longkak aitba anenogo. Amongnü NDMC nung inyaktertemi longkak aitba tesem Jantar Mantar merüktetba noksa nung angur.

Lok Sabha nung tokteptsü atema küm ajemtsüla: Revanth Reddy

New Delhi, July 26 (Agencies): NEET exam longkak aitba sülen Union Education Minister, Dharmendra Pradhan menden nungi anenogo, aser iba dak sendakba nung Opposition lenirtemi lanurtem nem tenüsang agütsür. Telangana Chief Minister, Revanth Reddy-ibo, Lok Sabha election aser state assemblies election nung tokteptsü atema arrshi küm ajemtsüla, ta shiogo. Amongnü Hyderabad nung lokti senden ka nung jembidang Reddy-i, "Congress-i takok ngua Centre nung sorkar kümra aser Rahul Gandhi Ato kilonser kümra education minister ji Gen Z (arrshi küm 14-29) lanur ka asütsü," ta metetdaksü. Election nung Gen Z lanurtemi tongtibang shilem agütsüla aser Lok Sabha aser state assembly elections nung tokteptsü atema arrshi küm telatet ajemtsüla, ta pai ashi. "Arrshi küm 21 lanur ka IAS officer kümtetra parnoki local body elections nung tokteptsüla aser civil services ajanga linük tenzüktettsü. Süra kechiba parnoki Assembly aser Parliament elections nung metoktepteter?" ta pai

asüngdang. Reddy-i, taoba mapang Ato kilonser Rajiv Gandhi-i vote agütsütsü temsüa akümba küm 21 aliba nungi 18 akümstsü atema telemtetba agia liasü aser PV Narasimha Rao mapang nung local body election nung tokteptsü atema arrshi küm 21 tashi ajemja liasü, ta ashi. Paisa, Germany, United Kingdom aser Singapore ama linüktem nungbo election nung tokteptsü atema lanur lenirtem nem temelaba agütsür, ta ashi. Chief Minister Reddy-i, India nunger nütsüng shilem 30 bo Gen Z lanurtem lir, ajisüaka Parliament nung züngsemtem shilem 1 dang Gen Z lanurtem lir, ta ashi. "India nunger tarutsü tiaji lanurtem ket nung lir," ta pai ashi. Reddy-i, longkak aiter kaketshirtem anema benoka aliba ken otem Centre sorkari agienadoktsüla aser NEET exam dak sendakba nung soseta asüba kaketshirtem kibongtem nem senotsü teyari agütsütsüla, ta takhangba agütsü. Iba takok ya yimtenren party kar takok masü saka India nunger lanurtem takok lir, ta shia Reddy-i lanurtemi maneni pei temeden atema raratsüla, ta ayongzü. aser



July 26, 2026 nü Varanasi nung 27buba Kargil Vijay Diwas amongdang nisung kari sepaitem nem tetushi agütsüba noksa nung angur.

Yipru agi Odisha-Bengal tzüyimkümlen kongshitsü: APSDMA

Amaravati, July 26 (Agencies): Amongnü Andhra Pradesh State Disaster Management Authority (APSDMA)-i, northwest Bay of Bengal aser north Odisha-West Bengal tzüyimkümlen taruba ghonda 24 tsünga cyclonic yipru tulu ka tentettsü, ta metetdaksü. Iba yipru ajanga Andhra tzüyimkümlen ghonda ka nung mopung kilometer 65 tashi kera aontsü, anungji Bodhbar tashi angopurtemi tzüyimleni angopui maotsüla, ta parnokisa tekümdangtsü metetdaksü. Andhra Pradesh State Disaster Management Authority-i, iba yipruji northwest tsütsülemi ondar aser Hombarne mesüra Hombar nikongdang tashi nungbo Odisha-West Bengal tzüyimkümlen Paradip aser

Sagar Island na tsünga süitsü, ta metetdaksü. "Iba yipruji ghonda 24 tsünga cyclonic yipru akümstsü. Metre 7 den tatsüba rongtembo mamshitsüla aser Bodhbar tashi angopurtemi tzüyimi maotsüla," ta APSDMA Managing Director Prakhar Jain-i sangdong ka ajanga metetdaksü. Iba mapang nungji tzüyim nung tzüsem tulu alitsü aser mopungji ghonda ka nung kilometer 65 tashi kera aontsü, ta pai metetdaksü. Pai tzüyimkümlen alirtem aser angopurtem dang kanga kümküma alitsü metetdaksü. Iba yipru ajanga Hombarne Srikakulam, Vizianagaram, Parvathipuram Manyam, Alluri Sitharama Raju, Eluru, Visakhapatnam aser Konaseema district tem nung zünglu arutsü.



TIR YIMYIM YIMOBILEM (EDITORIAL)

DIMAPUR MONDAY, JULY (CHITENI) 27, 2026

CJP ya Naga nunger asübo !

Supreme court nung tongti obendanger, Surya Kant-i linük nung mapa mangu ser teinyaktsü kecha maka, government tai pua jajar lanurtem ya leplu dang mesük, parnokji kar media nung, kar RTI activists ano kar tanga activists, parnoki nisung ajak tai pua jajar, parnokji tangar dak dang metaloker timtem agütsürtem lir ta ashiba o jepzüka, lanur ka tenüng agi Abhijeet Dipike-i “ süra leplu ajak adenshir apuso nungbo koda (?),” ta online nung asayamenüka ama sensaksemtsü tenzüka nung alima tesem balala nungi lanur million 22 tashi agi langzüka shilem agiba ajanga, iba telok dang Cockroach Janta Party (CJP) ta tenüng agütsür India nung lanurtem mapa manguba aser tatidang junga magitetba tamakok anema lanurtem longjemer nokdaksü asoshi apuso. Abhijeet Dipike ya US nung tezüngdak lanur ka lir aser pa ya 2023 tashibo Aa Aadmi Party nung Media aser Communication nung tongti shilem agir ka liasü. Pa leniba nung lanurtemi CJP telok tenteter külen India nung Education syatem majungba anema lanurtem ayongdener nokdaksü asoshi June tetenzüklen India-i meyipa aru. Pa aruba sülen Jantar Mantar tesem nung CJP telok tenüng nung longkak aita Union Education minister mapa nungi anentsü takangba agüja tenzüka, yakanü tashi nungbo lanur lakh dak tali adenshia tatartem adenshidak parliament tashi aotsü merangba asenoki nguogo. Iba leplu telok, Cockroach Janta party nung adenertema nisung aika, Delhi nung dang masü saka India tesem balala nung Union Education minister mapa nungi anentsüla ta kasa takangba agüja longkak aita sentong nung shilem agidang yiruogo aser sepaitem rongnunga karbo yirur alitsü. Ajisüaka, lanurtemi tasüa majem anü tatsük aser tzünglu manung timtem jenti agia iba tongpang nung nokdakba ajanga, tesüsabo government-ia metizüktet Union Education minister mapa nungi anendaktsüogo. Atangji, India nung Education aser Exam system tajungba küma yanglutsüba minister-ba anenba kisüng jagi majungtsü saka inyakyim metongshitsüla aser ketdangsertem shisatsü merüktetsüla. Aji oda, tang nungibo, talisa, medical züngnertem asoshi agütsüba NEET tatidang dena shitak agitettsü imlar. Iba ama ajungbena lanur kati anir tentetba CJP teloki government anema nokdakba sentong ya Nagaland nung Naga nunger dak ataloker asübo, CJP telok yagi takok mengula ta bilemer, kechiyong Abhijeet ya Naga nunger ka asünungbo tanga Naga kintemi pai aniba telok nung par kin nungi shinga madentsü ozüng agütsütsü. Tanabuba nung Jantar Mantar tesem ya Nagaland nung alika asübo, iba tesem ali kibur Naga kin koba südir iba kin Hoho jagi iba tesem nungji kaketshir aser lanurtem adenshia government anema ola adoktsü memelatsü. Ano, Education minister aser obendanger tongtiba to Naga nunger ka asünungbo, par kini tena pu asemtsü aser lanurtemi par kin anema apusor ta akümtsü, anungji minister-ba aser obendangersanger na kin nungibo lanur azüjang kata Naga Jantar Mantar jagi marutsü. Aji oda, asenok Naga nungerbo mapa mangua tarem, ayatzüraa tarem aser tangari asen temeten rakzüa mezügmeshiba mapatem nunga tarem, iba jagi asenoki inyakyim meshitakbatem memetongshiteter aser taiang shitak aser shitakang tai ta kümdaytsü. Ashiko, Abhijeet Dipike-jia Naga nunger asünungbo, tangbo joko gari tajung ka nung mener CJP ta zülur senzua lila ta bilemer. Atangji, iba yagi asenok o tangar na pei lima meima shilem agiba nung tetsüngda sayur. Iba jagi pi lima ajunger aser asen lima majunger. Joko, CJP purtem ama asenoka asen - pi ta mali kechi tai aji anemtsü aser kechi shitak aji azüittsü ta asangsang nung ochi mulungjang agi inyak tenzüklaba !

OLEMSABANG

Konang-nungsang agütsütsü tim nungpo agütsütsüla

~ L. Kika Pongener

(Yashi adok nungi...)

Ano asen Naga nunger otsü nung züngdangra....Asen Naga lima ya Assam küpok District ka dang aliba; 1963 küm asen lennir shirnoki Nagaland ya India küpok linuk (State) ka küma alangzüka küm teta yutsüogo; parnok dang kanga pelatsüla aser tenungsang agütsütsüla. Iba State jenjang anguba ya kanga mela-mela anguba masü; saka asen Naga nunger lennir tajung aika taküm tenla-a aser azü (Blood) tenla-a alangzüka senmang lir. Anungji asen Naga nunger tulu-tila ajaki asen lennir shirnoki iba State jenjang alangzüka yutsüogo....Parnok nem konang-naroküm agütsütsü kanga dang tetemsu. Koba linuk sudir suang; nubur tulu-tila ajaki mezünpur nem konang-nungsang agütsütsülaKechiyung parnoki pei taküm aser azü tenla agüja alangzüka yutsüba linuk nung asenok anisungzüka alir.

Asenoki otsüla oboula nunger sobaliba-a lia aruba meyipa reprangdangra....Parnoki beshiba sobaliba tajung aika lir....Otsüla oboula nunger kati ka nem tenungsang agüja, kati ka züngshia, kati ka akümtsüba, kati ka den sungpo aputepa lia aruba sobaliba tajung aika lir. Par mapang tanü putu nung amai kaketshir, azüng-zülu meteter, tashitemeteter mali asü....Yongji, par putu nung lipoklisang meteter aser kenshi-oshir dang tashitemeter ta jar; parnok dang akümtsüba lia aru. Shirnok tsük chen ana-asek tokoka yur; kimong-lumong aser yokya-sonu lim aika aka; aser yimer nem yimpoksu agüja kika-suchi benjong nangzüka....Parnok dangji takar ta jar konang-nungsang agüja lia aru. Takari sensaker nem tsükdem agüja chiyungdakja lia aru. Sensakeri takar dang tenzüker kati ka akümtsüa lia aru. Kenshi-oshiri kika-suchir aser nokinketer nem ken tajung mejema tenlokja kati ka tushia lia aru. Par putuji yim o yim na anemtepba putu asünung....Shirnoki tokolak (Mangko) aika alep; parnok dang nokinketer aser talep-tatsünger ta jar; konang-naroküm agüja tushitepa lia aru. Putu yimsüsüri nutsüng-nubur dang asü-anguma; tanak-temesung aser tulu-tila mebendangi yimsüsüa; kati ka den sungpo aputepa lia aru. Yimkü yimlir dang akümtsüba kati ka tenzüktepa lia aru. Yimkü yimliri par ayimer nem alu chidaktsür; kimong nung lidaktsür; ki asütsü aser chen asütsü yokya-sonu lim nung longmi, aou-ashi lepdaktsür, sura sahdaktsür aser tatsüktsü sung kohdaktsür kati ka den jungtepa yaritepa lia aru.

Asen Aor dak tashimait kaji....Ajak korang-semer dang sunuba, tuluba shisangtepba aser tenungsang agütsütsü tim nunga magütsünuba; ibala jakla yimya yapo melenshitsüla. Tsüngrem nema tenungsang agütsütsü tim nungpo agütsütsüla aser nisung nema tenungsang agütsütsü tim nungpo agütsütsüla. Shirnok nem par mapa agi alang konang-nungsang aser konang-naroküm agütsütsü tim; kecha atsü-ayung mesui agütsütsüla. Putu yimsüsür dang akümtsübur; lennir dang tenzüker; tambu dang tambu jar aser kati ka akümtsüpua lira....Asen lima nung yimchi-yimjung aser temoatsü alitsü. Aji oda, tanübusang agi tambusang kodanga mekümtettsü aser talak agi tazüng kodanga mekümtettsü; kechiyung aji alima sobaliba yimya ozüng (Universal Truth) lir. Anungji asen lima nutsüng-nubur yimjung nung sunepa, longjema alitsü asoshi....Putu yimsüsür, tata-tainer aser lennir ajaki nutsüng-nubur dang tila küma, nema-lur, asü-anguma; tambu-su agi azü-azüa beshitsüla....Aser nubur madak tain mazü maintsüla....Nutsüng-nubur-ia yimden yimsüsür dang akümtsübutsüla. Asen Aotsür Aor tulu-tila ajaki otsüla oboula nungeri beshia aruba sobaliba tajungtemji nendak-nendaka beshidi aser wazüka yudi. Asenoki kati ka nem tenungsang agüja; kati akümtsüa lira....Asen lima nung tsük-ensung asütsü, azükaro, temoatsü alitsü aser alima lennir watsü-wabong tajung adoktsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Solomon Chubai asüba Tenla ki arongba süng terongtu ngutetogo



July 26, 2026: Laishiba nung 2 Chubatem kaket nung kanga tongtibang tatalokba kar lir, aser item rongnung Nebuchadnezzar Chuba aser Babylon nunger sepaitemi 586 B.C. nung Yirusalem amakba, Solomon Chubai asüba Tenla ki rongdoktsüba aser senti rongsen aika bener oadokba otsü lir.

Yirusalem yimti maakdokba ya Laishiba shin o nung lir, aser iba tatalokba ajanga Israel nunger putiotsü nung temelenshi tulu adoka liasü.

Item tatalokba sülen küm 2,600 lir tang Israel nung archaeologist temi Solomon-i asüba Tenla ki arongba mapang rongdokba süng terongtu (sanen terongtu) ngutetogo.

Tan hopta Israel Ministry of Tourism-i sangdong ka ajanga, Jerusalem Walls National Park kübok Givati Parking Lot nung Israel Antiquities Authority aser Tel Aviv University nati senteper ali tua bushisüngdangba mapang nung sanen terongtuji ngutet, ta

metetdaksü.

Nebuchadnezzar Chuba aser Babylon nunger sepaitemi Yirusalem amakba mapang nung Tenla kidang mi senoktsüba sülen Tenla kiji chirepa liasü, ajisüaka ali telung nung sanen terongtuji tesüiba küm 2,600 tashi wazüka aruogo.

2 Chubatem tapu 25 nung Babylon nunger sepai arkotong, Nebuzaradan-i Kibuba tekülem kidang mi senoktsüba, tamarener kidang aser Yirusalem nung aliba kiojentem nung mi senoktsüba indang shia lir.

Iba mapang nungji Babylon nungertemi Tenla kidang nungi hon, taribi aser yongmen-in agi yangluba sentioaset aika bener ao.

Israel Ministry of Tourism-i, "Item sanenji tsüngbang-kilem nung perlang ama amshi asütsüa akok," ta metetdaksü.

Excavation Director Efrat Bocher-i, "Tenla ki raksaba mapang nung kiji atem nung chirepa liasü. Tenla ki jara nung atepba 'plaster' ji mi agi molusar tsükba ajanga süng

terongtuji nembang, aser ibaji ajanga süng terongtuji tesüiba küm aika wazüka yutet asütsüa akok, ta onoki bilemer," ta metetdaksü.

Bocher-isa, "Iba tebushitetba ajanga Tenla ki raksaba tatalokbaji yimdangi arua asenokia kuli süa angu ama bilemer," ta metetdaksü.

Israel Antiquities Authority nungi Johanna Regev-i, Israel nung süng telung nung tarensen maitsü aika aliba ama süng ya mangutsü," ta ashi.

Bocher, Regev aser tangartemi, Yirusalem nung alirtem tanaben meyipa aruba sülen parnoki yimti asentenshir yanglushi, aser parnoki puti otsü mesamadaksütsü atema Tenla ki teraksaji yamaji dang toktsü asütsüa akok, ta metetdaksü.

Israel Antiquities Authority nungi Yiftah Shalev aser Tel Aviv University nungi Yuval Gadot nati, "Alima tesem aika nung maitsü mesamatsü atema wazüka ayuba yimya benshir. Otsü mesamatsü atema wazüka ayuba ya meimchirtem nüngdak ka lir," ta metetdaksü.

Europe nung nisung million 1 Khrista dangi anir arutsü atema inyaker

July 26, 2026: Europe nung aliba Khristan ministries aser Arogotem nungi temelungertem noklang aikati July ita tembang tashi nung nisung million ka Khrista dangi anir arutsü atema atemzüka Khrista osangtajung lemsatepa arudar.

"The Millionth Month" ta ajaba campaign ya July 3, 2026 nü tenzüka liasü aser iba campaign ya July 31, 2026 nü tembangtsü.

Iba outreach campaign ya Dublin, Frankfurt, Barcelona, Tallinn, Helsinki aser Zurich densema Europe nung aliba yimtitem aika nung agidar.

Iba campaign ayongzükertem indang website nung yamai shia lir, "Khrista nung temang ka longjemtsü, renema alitsü aser Europe nung aliba yimtitem

lenmangtem nung nisung million ka ajurua Khrista osangtajung lemsateptsü atema Kibubai onok nem mangdang ka agütsü."

Ita ka piyong campaign agiba mapang nung Europe nung samaba tanelatem anidentsü atema tamangertemi longjemer inyaker.

"Kodang Khrista osangtajung lemsatepdir Yisui mapa inyaker aser ajak melenshir," ta website nung shia lir.

Iba campaign ya Rome 10:14 nung ajemdaker agir. Iba Lai tekong nung yamai shia lir, "Ajiangla shiba dak parnoki mamang, pa dang koda ajatsü? Aser shiba indang parnoki mangashi pa dang koma amangtsü? Aser sayutsüngir ka melira, parnoki koda angashitsü?"

Ministry outreach nung shilem agirtemi City Impact ta ajaba mobile app ka amshia Khrista agizükertem indang record asür aser maneni nütsüngsütsü atema inyaker.

Iba outreach campaign jakdang shilem agirtemi tamasa Khrista osang prokba aser nütsüngsüba dak sendakba training ka agia liasü.

Iba dak alia outreach agiba mapang aonung shia "Glory Nights" ta ser sentong ka ayongzüka agir, aser item sentong nung tekülem agiba den külemi taküm kuli lemsateper.

Tamalen Millionth Month campaign nung nisung 73,000-i Khrista osangtajung angashia liasü aser nisung 7,320-i Khrista sülen anidaksü telemtetba agia liasü.

ANO GO ABEN TSÜNGREM DEN

Lanurtem Khrista asoshi

*Tebenjem mapang ne Teyanglur bilemtetang.
Sayutsüngir 12:1*

Asen Teyangluri Pa yimli nung lanurtem tenzüka jenjang tulu nung yutsü. Tamaren Ejip yimli nung Yosef küm 30 alidang Prime Minister aser chiyungtsü nung ketdangser aküm. Israel nung yimtenren mesüngjemteti aliba mapang asangur Samuel tanishir aküm. Asangur Dawidi Filistan nunger nokinketer Goliat tepset. Pauli asangur Timoti Efesa arogo achaayangtsü toktsü, aser shingai nema mezüngmeshi mesüdaktsüi saka o nung, taküm yimya nung, temeim nung, tamang nung aser temerükba nung tamanger tsüngdang tatishitsü ka liang ta zülü! (1 Timoti 4: 12).

Ano tamang katetba tetsür aiür, Ruth indang asenoki 'Laishiba nung angur. Ruth aiür amitsür ka liasü. Lai Tsüngrem dak amangba tamang aser Tsüngremer nübur dang bendanga agüja meimba sayur. Tobur tajung Estheri pei pur tesamatsüba nungi kümzüktsü nok-o-nü ama amshi. Tsüngrem yimli yangertsü asoshi lanur aika Tsüngremi amshi.

Tsüngremi maneni jangrabangra, tasü tait, taremzük aser tenendak lanurtem Pa yimli nung amshiner. Tanüa lanur shibai Kibuba asoshi meshiteta bendanga agütsütsü ? (I Putipuyang 29:5).

Pakistan nung Supreme Court-i Khristan ana tepsetertem chiok



Shahzad Masih aser pa kinüngtsü, Shama Bibi

July 26, 2026: 2014 küm aikati Pakistan aitsüba sülen Pakistan nung Khristan apuani, Shahzad Masih aser pa kinüngtsü (mashisa), Shama Bibi na tepsetba ken o nung aija taküm piyong tepuokdak ayutsü obendang agütsür aliba nisung asem tepuokdak nungi chioktsü atema Supreme Court-i tetuyuba agütsüogo.

Tamalen iba ken o nung melung melemteti apuba nisung 102 bo chiocker liasü, anungji Khristan ana tepsetba ken o nung tangbo shinga tepuokdak mali.

2014 küm November 4 anogo nung Kot Radha Kishan anasa yimtsüng ka nung Muslim nunger lokti kati, Shahzad aser Shama nati Quran temeshi kaket raksatsü, ta tena nem tai tonglokja tena dak azükba sülen lungru moludak telung nung inokja tepset.

Iba tatalokba sülen linük

aikati Pakistan aitsüba sülen police-i yimdaklir noklang aika pua liasü aser nisung tepsetba ken o benok.

2016 küm November ita nung Anti-Terrorism Court-i nisung pongu taküm piyong tepuokdak ayutsü obendang agütsü, nisung 9 mapang tatsüka tepuokdak ayutsü obendang agütsü aser kuli peria maliba ajanga nisung 92 bo chioka liasü. Iba ken o maneni angadangba mapang nung Lahore High Court-i taküm piyong tepuokdak ayutsü obendang agütsür aliba nisung anabo chiok aser tang tesüsa Supreme Court-i tanüngba nisung asem- Irfan, Mehdi aser Riaz nunger chioktsü tuyu.

SC tetuyuba sülen Pakistan nung Khristan teloktem aser meimchir temeden atema inyakba teloktemi court tetuyubaji sashia aitsüogo.

Trump ajurui Israel PM Netanyahu tanü Washington-i arutsü



Washington, Chiteni/July 26 (Agencies): US Tir Donald Trump ajurutsü atema Israel Ato Kilonser Benjamin Netanyahu Hombarnü Washington-i arutsü lir. Washington aser Tehran tsüngta tangatettep kati arutsü meranga jembishinüba nung tamakok ajuruba sülen West Asia nung tensa tamajungba kuma American mitkartemi Iran nunger aliba tesemtem nung maneni amakba mapang ka nung Netanyahu ya Trump ajurui arur alitsü.

Trump-i iba osang ya White House Correspondents' Association Dinner nung jembidang metetdaksü aser asüng-yanü Netanyahu-i Washington semdangtsü ta ashi.

Hopta ishika tejakdang lenir ana phone ajanga sensaksema mapang Netanyahu-i United States kumteter küm 250 ajungba atema Trump nem tenüngsang agütsü aser linük ana tsüngta tesendaktep tashi ita aliba tushia liasü.

Washington aser Tehran nati zülutepba Memorandum of Understanding (MoU) raksar US, Israel aser Iran tsüngta tensa tamajungba akumba mapang Netanyahu ya arur alitsü. Israel-i tetenzük nungi iba agreement anema nokdak aser parnok tanen makai Lebanon nung military operations agiba ajanga region nung tesunep bener arutsü merangba nung tetsükdaksü agüja liasü.

Kasa mapang Trump administration ya ano Israel aser Lebanon den arütsü alema azüdokshiba anendaktsütsü meranga jembishinü akar. Iba jembishinü nung Hezbollah maden, aser southern Lebanon

nung Israel kübok aliba tesemtem ya tanemi Lebanese armed forces nem amoktsütsü ta linük anaprongi mulunga lir.

Ajisüaka March ita nungi iba ken o nung terenlok kangabo mali. Hopta tetenzüklen Lebanon Tir Joseph Aoun den senden ka amendang Trump-i item tesemtem nungi Israel sepaitem ainshitsü mapang telatet magütsü.

Israel-i maneni Gaza nung military campaign aliba mapang ka nung Netanyahu-i US semdang alitsü. US tetsüngtai ia ceasefire ya taoba küm October ita sangdong, ajisüaka Israel sepaitemi Gaza nung maneni nüburtem dang tesem balala nungi ainshitsü ashir aser mapang shia amaker.

Ano US Tir Donald Trump-i Iran anema mitkar inyakyimtsü sentong tuluka sangdonga aliba soiter, aser US injang aser bomb ajema akumba ajanga iba telemtetba ya agi südi ta osangtem ajanga ashir. Military campaign ulushitsü sentong soitba ya Patriot missile interceptors aser tanga 'defensive weapons' agimaa aoba ajanga lir, ta The New York Times ajanga ashi.

United States aser Iran tsüngta rara tenzüker ita pongu ajungdang US-i mapang shia tayimtsü amshia amakba mapang ka nung iba osang ya temai adoker.

Yimjung ken o jembiba nung takok mongutetra Tehran dak jenjang tesashiba nung amaktsü ta Trump-i tekumdangtsü shia liaka Iran anema US military operations soita lir ta Pentagon osang kar ajanga ashir.

Trump-i iba telemtetba agiba tensa balala rongnung injang

bomb ajema akumba ya ka lir ta The New York Times ajanga ashi. Ano US tiri iba rara ya tuluba kuma Gulf nung tembar linüktem den tesendaktep mejungi kuma alima rongsenketzüng jenjang tali tamajungba akumtsüba indanga bilemer ta ashir. Hokulbarnü White House nung senden ka amendang tensa tali tamajungba akumtsü indang tebilemtsü onük ya Vice President JD Vance aser Chairman of the Joint Chiefs of Staff General Dan Caine nati benok ta ashir.

US mitkari ano operations takok ngua agitettsü tashi lir, saka ibaji ajanga takoksa tuluba alitsü ta General Caine-i Trump dang ashi. Trump-i asendenshir mitkar mapa meinyaktsü ta mashi saka yimjung asoshi jembishinü ali tajungba ta shia liasü.

"Onoki tang parnok den tejembidak lir. Parnok tali tali temulung agütsür ama ni bilemer," ta Trump-i ashi.

Axios ajanga ashiba agi, Pentagon-i Trump nem aonung 14 buba ashidena tayimtsü amshia amaktsü sentong bener oa agütsü, saka pai iba operation agitsü temelaba magütsü aser meranga jembishinü ang asütsü ashi.

US-i amakba anenaka hopta tatemlen Iran rara tuluba kuma Yemen nung Iran den tesendaktep aliba Houthi telungpuri Red Sea tzükumlen Saudi oil installations nung amak aser ano Caspian Sea nung Ukraine-i par rong tem amak ta Iran-i tai tongloksü.

Honibarnü US mitkari Iran anema rongnendak tesemtem nokdangba tang tashi shidak lir ta ashi saka aonung 13 buba ashidena amakba anenba indang rasaa mashi.

Iran-ia par kidanger linüktem nung hopta tatemlen amakba osang mali. Ajisüaka Caspian Sea nung Ukraine-i Iranian commercial vessel ka amakba nung rongnir ka tepset aser ka yiru, ta Iran indang Foreign Ministry ajanga ashi.

Mulungnen O

TASOBA : 6.1.1943

TASÜBA : 21.7.2026

REV. I. SOWA

"Ni rara tajungji raraogo ni alizüng tonga asemogo, ni tamangji yuogo. (2 Timothy 4:7)

Ozü tsürabur Rev. I. Sowa pa akümüli wadang tempangba anogo nung shirnokisa tenla nübo, rongsen aser sarasadem agi ozü nungita yariogo nenok ajak dang kanga pelar.

Nenok ajak asen tulusang Tsüngremi moajang ta ozüi sarasademtsür.

~ Temeim Chirnurtem, Anük-apang, Semchirtem aser Kinungertem.

ALI TAYOKTSÜ LIR

SM Colony Dimapur, City College anasa. Ali takong 4884 sqft. Price Rs. 1300 per sq. ft (Negotiable) Contact No: 8974571416 / 8798119488

Taoba Honduras tir kidangi meyipa aotsü



Tegucigalpa, Chiteni/July 26 (Agencies): Taoba Honduras tir Juan Orlando Hernandez nem ita ti tejakdang US Tir Donald Trump-i taitok agütsüba sülen pa kidangi meyipa aotsü. Temeseüpba mozü aser parngbong injang shibelenba atema aija pa U.S nung tepuokdak küm 45 ayutsü atema obendang agütsür liasü. Hernandez, shiba 2014 nungi 2022 tashi term ana tir mapa inyaka liasü, pa linük yimtiba Tegucigalpa nungi km 60 pilar Palmerola International nung private flight ka nung oa anentsü. Pa ya senotsü ochi meshi-i

amshiba ken o nung obendangtsü atema okadak ka matsüngdang August 3 nü nokdaksü imlar. Pa aputsü atema tetuyuba agütsüba June ita thitsü, aser iba tetezü pa linük tongli maputsü.

Bodhbarnü Reuters den sensaksema mapang arishi küm 57 tain Hernandez-i ashiba agi, pai pa anema ken o benoka aliba agintsü asoshi mepeshitsü.

Hernandez ya 2022 küm February ita Tegucigalpa nung apu aser ita ana lir US-i bener ao, aser iba mapang pai pa apuba anema ken o benoker liasü.

2024 küm US nung obendanger kati pa temesepba mozü aser prangbong injang shibelenba dak sendakba nung küm 45 tepuokdak ayutsü obendang agütsü. Iba tait süba ya pai magizüki arudar.

Trump-i pa nem 2025 küm tatemlen taitok agütsüogo, ajisüaka pa anema Honduras nung ken o benoka alibabo magin.

US, Japan aser Philippines nunger maritime drills takok ngua agiogo

Manila, Chiteni/July 26 (Agencies): U.S. aser Japan na Philippines den dena South China Sea nung maritime exercise tem takok ngua agiogo. Philippines aser China sorkar na mangatettep adoker aliba tzüyim nung linük ana indang rong nung mena alirtem tsüngda mangatettep adokba atema kati ka dak tai tongloksütepba aliba mapang tang iba exercise ayongzüka agia liasü.

Anogo pongu drill agiba ya July 21 nü tenzüker aser 25 nung tembangogo, kong warship, coast guard rongtem aser surveillance aser rara dang

amshiba tayimtsütem bener arua exercise balala agiogo, ta Philippine military-i Deobarnü ashi.

China-i South China Sea nung tesem tulu mekazüka aotsü merangba nokdangtsü atema US aser Japan nati teyari agüja Philippines-i jenjang agiba mapang kümtem tsüngda joint drill tem ya tuluba aser tesashiba agia arudar.

"Indo-Pacific region t a m e n d a k d a k manokshidaktsütsü, yimjung aser security ajungkettsü atema partner nation temi longjemer inyakba iba drill jangja metetdaksür," ta

military-i sangdong ka ajanga metetdaksü.

Military-i iba exercise ya koba tesem nung ayongzüka agiba indang osang tejangja magütsü. Taoba mapang drill ayongzüka agidang China nunger navy aser coast guard rongtem iba tesem nung inyaksangshia liasü.

Second Thomas Shoal nung China nunger Coast Guard ?personnel temi Philippines nunger rongnir ka dak azük ta Philippines-i ashiba sülen anogo ka lir iba exercise tenzüka liasü. Kasa mapang nung China-i ashiba agi, Philippines indang rong kati parnok tama

amak aser China nunger rong dak tsükokja liasü.

Philippine Coast Guard-i ashiba agi, drill mapang China nunger Coast Guard-i Scarborough ?Shoal anasa Brehostibar aser Hokolbarnü naprongla Philippine sorkar indang rong dak water cannon khalokja liasü.

China-i ashiba agi, Philippine indang rongtemi parnok litsü adena aruba sülen parnoki temzüng ozüng dak ajemdaker jenjang agia liasü.

Honibarnü Philippines' indang armed forces chief of staff tasenba Antonio Nafarrete-i, Philippine-i

atsünger aliba mangatettep adoker aliba Spratly asetkong nung Thitu asetkong semdanga liasü. Iba asetkong ya Palawan province nungi anütoklen km 480 shi pilar lir.

Nafarrete-i, asetkong nung amenoka liba sepaitem dang, iba outpost anüksü atema parnok kanga tongtibang ta ashiba den, operational capabilities akangshitsü atema takokba tashi teyari agütsütsü ta tenangzüka agitsü.

China-i, South China Sea ya ajunga amai parnok meyong ta ashir, aser 2016 küm iba dak sendakba nung obendang agütsüba magizüker.

KDFA-i 3buba Kohima district Grassroot Championship ayongzüka agiogo



Kohima, Chiteni/July 26 (TYO): Kohima district Football Association (NFA)-i ayongzüka 3buba Kohima district Grassroot Championship kanga takok ngua agiogo. Iba asayamung ya Indira Gandhi Stadium, Kohima nung Honibarnü asaya, kong team 32-i shilem agiogo.

Asayamung lapokba sentong nung OSD (sports), Resources & Sports, Roko Angami alakteta jaoker liasü.

O jemiba mapang Roko-i, grassroots football atema temulung agütsütsü ayongzüba den saisapong tarursü ya tekübokba jenjang nung sempet aketba lanur anitetba dak keta lir, ta ashi. Paisa, teamwork, yimyayimpong azüokba, taremküba aser sportsmanship amala yimyatam angazüdakja grassroots football ya iba asaya asoshi tamendakdak lir, ta ashi.

Football asaya ya ajaki angatetba oshi ka ta shia pai ashiba agi, asaya yagi nisungtem kechi tia jenjang nungi lidri liaka kecha mesükshi-i ajak longjemdaksür, kong bendanga agütsüba aser nendaka inyakba ajanga dang takokji asadanger.

Sorkari saisapong jenjang tajungba kümdaktsütsü atema sentong balala benoka inyakba inyakba indang jemiba mapang Roko-i, Department of Youth Resources & Sports-i, asayartem nem Baby League, Grassroots Football Tournament, Zonal School Pre-Subroto Tournament, women's Futsal League aser state level School Pre-Subroto Tournament amala sabangtem agüja arudar, ta ashi.

Maneni pai, CM Neiphiu Rio lenisüba nung state-i futsal ground 30 dak tema aser artificial turf ground aika yangluogo, aser Nagaland kübok tesem balala nung football asaya atema infrastructure tem yangluja arudar, ta ashi.

Lanur football asayartem ajungshia, Angami-i infrastructure kija agi takokertem manitetsü ta shia asayartem dang yimyayimpong azüoktsü, tangar dang nungi temerangba inyaktsü aser temaba jenjang tongtetsü atema teti practice asütsü ajungshi.

Roko-i asayartem dang parnok den toktepa asayartem aküm tsübuttsü, tasü ita asayatsü,

jangradema asayatsü aser iba asayamung ya parnok football asaya aoba mapang alizüng tongtibang ka ama züngshitsü ajung.

Asayamung shibangba sentong nung Councilor, Kohima Municipal Council Ward No. 10 alakteta jaoker liasü aser pai takokertem nem sempet lemja liasü.

Takokertem yamai alitsü:

Under - 10 Category: Champion: G. Rio School; Runner up: KIC Kohima

Golden Glove: Isisappi Guing (KIC), Golden Ball: Thejaphrezo Mere (G. Rio School)

Under -13 Category: Champion: G. Rio School; Runner-up: Khelo India Centre Kohima

Golden Glove: Mhasizhalie Suokhrrie (KIC Kohima); Golden Ball: Manentoshi Aier (G. Rio School)

Under -15 Category: Champion: Young Star FC; Runner-up: Tsieyama

Golden Glove: Nourhevi Rhutso (Kohima Sports Club); Golden Ball: Kekhriengulie Kuotsu (Young Star FC).

CWG 2026: Weightlifter Rishikanta-i silver medal angu

Chiteni/July 26, 2026 (Agencies): Glasgow nung tang asaya aliba Commonwealth Games 2026 nung Deobarnü India nung weightlifter Rishikanta Singh Chanambam-i tebur 60kg weightlifting event nung 264 kg ajungketa silver medal nguogo.

India nung weightlifter yagi snatch nung asemben merangdangba mapang 116 kg, 119 kg, aser 121 kg ajungket aser clean and jerk nung mezüngbuba merangdangba mapang 143 kg ajungketa silver nguogo.

Rishikanta-isa, clean and jerk nung tanaben aser tasembuba nung 148 kg aser 151 kg ajungkettsü merangdang saka makok.

Pa Malaysia nung Bin Kasdan Mohamad Anio sülen tanabuba jenjang nung tembang. Anio-i ajak senteper 273 kg (snatch: 121 kg aser

clean and jerk: 152 kg in the) ajungketa liasü. Iba ya pa asoshi Commonwealth Games weightlifting nung anabenbuba atonga gold medal anguba lir.

Bin Kasdan Mohamad-i 2022 Commonwealth Games, Birmingham nung tebur 55kg category nung Malaysia atema gold medal ngutsür liasü.

Rishikanta, shiba Manipur nungi lir pai Deobarnü snatch nung tasembuba ajungketba mapang 121kg ajungket aser iba ajanga snatch nung Commonwealth Games record tasen ka yangluja liasü.

Kasa mapang nung Bin Kasdan Mohamad Anio-ia, ajak senteper 273 kg ajungketa Commonwealth Games record tasen ka yangluogo.

Iba asaya nung Kenya nung asayar Joshua Amunga Mboya-i bronze medal angu. Pa ajak senteper 260kg (115kg snatch + 145kg clean and jerk) ajungket.

Anahat Singh-i World Junior Squash Championship kokogo



Chiteni/July 26, 2026 (Agencies): India tsürtem rongnungi No. 1 asayar Anahat Singh-i Honibarnü World Junior Squash Championship koka la ya India nung rongnung iba asayamung akokba mezüngbuba asayar kümogo.

Arishi küm 18 tain asayar yagi Ontario nung tetsür final asaya nung Egypt tsür Ruqayya Salem 11-3, 11-7, 11-9 agi koka liasü.

"Iba asayamung akokba ya tang tashi mamangeteter," ta Anahat-i tite abenba sülen ashi.

"Ni taoba küm pezü tsünga semi aser quarter nung aiben tsüka aruogo. kari danga asüngdangra ni iba asayamung ya atakatem ka ta shia aruogo aser iba asayamung nung khien danga junga masayateti aruogo," ta Delhi nungi asayar yagi ashi.

Anahat-isa, la junior ka ama tatembangbuba asayamung atongtsü sempet lir," ta Poncha-nung titel abenba ya kanga dang

special ta ashi.

"Iba ya kü atema tatembangbuba (junior ka ama) asayamung liasü aser title abentsü atema tatembangbuba maongka liasü," ta Anahat-i shisem.

Laisa, final masaya tsünga anisüngzüka aser jangradema asayatsü rangloker liasü, ta ashi.

"Ni kanga shisabulua bilemra ni junga masayateter ta meteta lir, anungji ni world championship final ya jangradema dang asayanüa liasü," ta lai ashi.

Squash Rackets Federation of India (SRFI) secretary-general Cyrus Poncha-i, Anahat-i takok anguba ya linük nung iba asaya atema alizüng tasen ka tongtetba lir, ta ashi.

"Iba takok ya India nung squash asaya puti otsü nung otsüsütsü mapang ka lir. Anahat dak temaba jenjang atongtsü sempet lir," ta Poncha-i ashi.

Cape Verde keeper Vozinha Colo Colo nungi asayatsü



Chiteni/July 26, 2026 (Agencies): Cape Verde goalkeeper, Vozinha shibai World Cup mapang kanga junga asayaogo, pa Chile club Colo Colo nung adentsü atema mulungtepogo.

Arishi küm 40 tain goalkeeper, shibai Spain den asayaba mapang goal aika nokdanga nungtugu aküm, pa iba club nung adenba mesangdong tsünga temang tendangtsü atema Chile-i arutsü, ta Colo Colo tir Anibal Mosa-i shir liasü.

Argentina densema temaba

jenjang nung aliba team tem den asayaba mapang goal tajung aika kümküba sülen Vozinha ya World Cup nung ajaki kanga bulua jembiba asayar ka aküm.

Goalkeeper, shibai lemluwa matong tsünga Portuguese second-tier club Chaves tokja liasü, pa ya FIFA indang fan-selected World Cup dream team nunga densema liasü.

"Vozinha Colo Colo asayar ka akümtsü. Taruba anogo ishika tsünga pa Chile-i arua temang tendangtsü aser Estadio Monumental nung metetpelatsü," ta Mosa-i ashi.

Paisa, Vozinha-i World Cup nung kanga junga asayaogo aser pa iba ajanga club nung asayatsü temsüa lir ta sayuogo, ta ashi.

Colo Colo-i pa den tenangzüktepba yanglutsüba indang social media ajanga metetdakja aruogo. Social media nung pa tejak mesayu saka pa indang khu tekirak tu

dang sayua aruogo.

Vozinha, shiba tenüng Josimar Jose Evora Dias lir, pa ya Brazil nung influencer Casimiro-i teyari agütsüba sülen social media nung kanga nungtugu kümogo. Pa Instagram nung follower 50,000 aliba tangbo million 30 jungnüa kümogo.

Maneni pai, pa tetsü Ana Candida Evora US-i arutsü atema visa asoshi taah magütsütetba ajanga par jabasa asayaba merprangtetsüsa kümogo ta ashiba sülen ano osang ajak nung adoka liasü.

Iba sülen la nem US-i arutsü atema angati agi visa agütsü.

Colo Colo shirnok Chile yimtiba Santiago nung amendaker lir, parnok tang Liga de Primera nung temaba jenjang nung lir.

Parnok ya Chile nung takok tajungtiba anguba club ka aser linük nungi parnok kijai Copa Libertadores koka lir.

BILEMDANGANG

"Takokera tamakoker medeni koda shisangtsü."